

Ullormut oqaluuserisassani ikaarsaariarnermi tulliuuttumut Siunnersuut Inatsisartut Suliariaasiat § 52 malillugu

Inatsisartut inatsisaat nr. 6 13. maj 1993-immut Naalakkersuisunut ilaasortat akisussaanagerat pillugu ersarilluinnarpoq.

§ 6. Naalakkersuisunut ilaasortaq § 10 naapertorlugu pineqaatissinneqassaaq piaaraluni imaluunniit mianersuaalliorujussuarnermigut Inatsisartut Naalakkersuisullu pillugit Inatsisartut inatsisaat inatsisilluunniit allat malillugit imaluunniit atorfimmi suunera malillugu imminut pisussaaffigisassanngortitaasut malillugit iliunngikkuni.

Imm. 2. Imm. 1-imi aalajangersagaq aamma atorneqartassaaq Naalakkersuisunut ilaasortaq eqqunngitsumik paasinerluutaasinnaasumilluunniit inatsisartunut paasissutissiisimappat imaluunniit inatsisartut oqaluuserisassamik oqaluuserinninneranni paasissutissanik oqaluuserisap inatsisartunit aalajangiiffigineqarnissaanut annertuumik pingaaruteqartunik nipangiussisimappat.

Naalakkersuisunut ilaasortat tamarmik amerlanerussuteqartuniit tunuliaquteqarlutik atuuffimminiittussaapput, Naalakkersuisunut ilaasortat tamarmittaaq nunatta ineriartornissaanut aqut eqqortoq ingerlavigissallugu piginnaasaqarfigalugu atuuffeqartussaapput.

Naalakkersuisut Siulittaasuata akisussaafigivaa, Naalakkersuisut ataatsimut eqqortumik tutsuiginartumillu sulinissaat, §6 malillugu.

Aalisarnermut Inatsisissap sammineqarnerani ataasiaannaratik Naalakkersuisut Inatsisartuni ilaasortat pasillerlugit pipput. Inatsisartut inatsisaat nr. 26, 18. novembari 2010-meersoq §5 ersarikkaluaqaaq, issuarpara:

”§ 5. Inatsisartut innimiginarluinnartussaapput.”

Ulloq 10. maj Naalakkersuisoq Inatsisartuni ilaasortat pasillerpai eqqunngitsunik paasissutissanik siammarterinerarlugit. Tamannalu tusagassiorfinni uteqqippaa 12. maj.

Naalakkersuisoq alla unnerluussereerluni, Inatsisartuni ilaasortaq unnerluussutaanut tunngavissaqanngitsoq aaliangerneqareertoq, tusagassiorfinni aamma inuit tamat oqallittarfianni suli pasinarsaaraluni nalunaaruteqarpoq.

Ajoraluartumik tamakku ataasiakkaaginnaanngillat, maannalu ersarissilluni Naalakkersuisut Siulittaasuata Inatsisartut innimiginarluinnartussaatinngit, Naalakkersuisuniittut naqqiuteqarfiginagit akuersaarpaa pissuseq tamanna.

Qulaani pineqartut tunuliaqutaralugit siunnersuuteqartariaqarpugut ullormut oqaluuserisassani ikaarsaariarnermut tulliuuttumut Naalakkersuisut tamarmiusut peqquteqartumik tatiginnikkunnaarnermik takutitsissalluta isumaqarpugut.